

四庫全書

集部

欽定四庫全書

石倉歷代詩選卷九十八

明 曹學佺 編

晚唐二十五

李羣玉

字文山
澧州人

烏夜啼

層波隔夢渚一望青楓林有鳥在其間達曉自悲吟是
時月黑天四野烟雨深如聞生離哭其聲痛人心悄悄

夜正長空山響哀音遠客不可聽坐愁華髮侵既非蜀
地魂恐是恒山禽四子各分散母聲猶至今

昇仙操

羸女去秦宮瓊笙飛碧空鳳臺閉烟霧鸞吹飄天風復
聞周太子亦遇浮丘公叢簧發天弄輕舉紫霞中濁世
不久住清都路何窮一去霄漢上世人那得逢

愁怨

瑟瑟涼海氣西來送愁容金風死綠蕙玉露生寒松所

思在溟碧無因一相逢登樓睇去翼目盡滄波重虛窗
度流螢斜月啼幽蛩疎紅落殘艷冷水凋芙蓉歲暮空
太息年華逐遺踪凝情耿不寐攬涕起疎慵

感春

春情不可狀艷艷令人醉暮水綠楊愁深窗落花思吳
宮新暖日海燕雙飛至愁思逐烟光空濛滿天地

湘中古愁二首

涼風西海來直渡洞庭水脩脩木葉下白浪連天起蘅

蘭委皓雪百草一時死摧殘負志人感歎何窮已

昔我觀雲夢窮秋經汨羅靈均竟不返怨氣成微波奠
桂開古祠朦朧入幽蘿落日瀟湘上淒涼吟九歌

我思何所在

我思何所在乃在陽臺側良宵相望時空覩明月色歸
魂泊湘雲飄蕩去不得覺來理舟楫波浪春湖白烟光
浩楚秋瑤草不忍摘因書天末心繫此雙飛翼

感興

洞房三五夕金缸凝燭滅美人抱雲和斜倚紗窗月沈吟想幽夢閨思深不悅絃冷玉指寒含顰達明發

送人之峽

東吳有賦客願識陽臺仙彩毫飛白雪不減郢中篇楚水五月浪輕舟入暮烟巫雲多感夢桂楫早回旋

江樓獨酌懷從叔

水國發爽氣川光靜高秋酣歌金樽醪送此清楓愁楚色忽滿目灘聲落西樓雲翻天邊葉月弄波上鉤芳意

長遙落蘅蘭謝汀洲長吟碧雲合悵望江之幽

登章華樓

楚子故宮地蒼然雲水秋我來覽從事落景空生愁
霸業沒荆棘雄圖成古丘沈吟問鼎語但見東波流
征鴻引鄉心一去何悠悠晴湖碧雲晚暝色空高樓
迢遞趨遠嶠微茫入孤舟空路不堪望西風白浪稠

湘西寺霽夜

雨過瑤璃宮佳興浩清絕松風冷晴灘竹路踏碎月月

波蕩如水氣爽星朗滅皓皎千樹寒崢嶸萬巖雪後山
鶴唳斷前池荷香發境寂涼夜深神思空飛越

送鄭京昭之雲安

君吟高唐賦路過巫山渚莫令巫山下幽夢惹雲雨往
事幾千年芬芳今尚傳空留荆王館巖嶂深蒼然楚水
五月浪輕舟入蘋烟送君揚楫去愁絕郢城篇

法華微上人盛話金山境勝舊遊在目吟成此

篇

江上青蓮宮人間蓬萊島烟霞與波浪隱映樓臺好潮
門梵音靜海天日光早願與靈鷲人吟經此終老

洞庭入澧江寄巴丘故人

四月桑半枝吳蠶初弄絲江行好風日燕舞輕波時去
事旋成夢來歡難預期惟憑東流水日夜寄相思

漢陽春曉

漢陽抱青山飛樓映湘渚白雲蔽黃鶴綠樹藏鸚鵡憑
高送春日流恨傷千古遐思禰衡才令人怨黃祖

別尹鍊師

吾家五千言至道懸日月若非函谷令誰註流沙說多
君飛昇志機悟獨超拔學道玉笥山燒丹白雲穴南窮
衡嶷秀採藥歷幽絕夜卧瀑布風朝行碧巖雪洞宮四
百日玉籍恣探閱徒以菌蟪姿緬攀修真訣塵籠罩浮
世遐志空飛越一罷棋酒歡離情滿寥泝愿騎紫蓋鶴
早向黃金闕城市不可留塵埃穢仙骨

送魏珪覲

水落楚色深風高浪花白送君飛一葉鳥逝入空碧倚
歟白華秀傷心倚門夕不知雲漲遙萬里看咫尺蕭蕭
清楓岫去掩江山宅離觴有黃花節物助淒戚瀟湘入
瀟桂一路縈水石烟蘿拂行舟玉瀨銛枕席多君林泉
趣耽翫日成癖長嘯凌清輝襟情當空滌登龍屈指內
飛雨甚籍籍未折月中枝寧隨宋都鵠日余吞聲地舉
足傷瓦礫見爾一開顏溫明乃珠壁春風到雲嶠把酒
時相憶萱萑花入船鷓鴣啼送客颺天與嶂海此去備

沿歷珍重春官英加餐數刀帛

洞庭遇秋

塵愁老來顏久與江上隔
逍遙登湖上洗眼見秋色
涼波弄輕棹湖月生遠碧
未減遙客情西望杳何極

寄短書歌

骨肉萍蓬各天末十度附書九不達
孤臺冷眼無來人
楚水秦天莽空濶
翔雁橫秋過洞庭西風落日浪崢嶸
三年音信凝顰外一曲哀歌白髮生

醒起獨酌懷友

西風靜夜吹蓮塘芙蓉破紅金粉香
摘花把酒弄春芳
吳雲楚水愁茫茫美人此夕不入夢
獨宿高樓明月涼

初月

灑灑流光淺娟娟泛露輕雲間
龍瓜落簾上玉鈎明桂
樹枝猶小仙人影未成欲為千里別
倚幌獨含情

又

凝顰立戶前細魄向娟娟
破鏡徒相問刀頭恐隔年輕

輕搖遠水脉脉下春烟別後春江上隨人何處圓

雲安

灘惡黃牛吼城孤白帝秋水寒巴字急歌迴竹枝愁樹
倚荆王館雲昏蜀客舟瑤姬不可見行雨在高丘

湖濶

楚色籠青草秋風洗洞庭夕霏生水寺初月落雲汀棹
響來空濶漁歌發杳冥欲浮闌下艇一到斗牛星

失鶴

瑤臺烟霧外從昔有遐心暗海蓬壺淺晴霄碧落深墮
翎留片雪雅操入孤琴不是籠中物雲蘿更莫尋

臘夜霽雪月彩交光開閣臨軒竟睡不得命家
僕吹笙數曲獨引一壺奉寄江陵副使杜中
丞

月華臨霽雪皓彩謝韶裘桂酒寒無醉銀笙凍不流懷
哉梁苑客思作剡溪遊竟夕吟瓊樹川途恨阻修

長沙陪裴大夫登北樓

巖嶂隨高步，琴樽奉勝遊。
金風吹綠簾，湘水入朱樓。
朗抱雲開月，高情鶴見秋。
登臨多暇日，非為賦消愁。

登蒲澗寺後二巖

五仙騎五羊，何代降茲澗。
有堯年韭山，餘禹日糧樓。
臺籠海色，草樹發天香。
浩笑波光裏，浮溟興甚長。

旅泊

搖落江天裏，飄零倚客舟。
短篇纔遣悶，小釀不供愁。
沙雨潮痕細，林風月影稠。
書空閒度日，深擁破貂裘。

晚蓮

露冷芳意盡
稀疎空碧荷
殘香隨暮雨
孤蕊綻寒波
楚客罷奇服
吳姬停櫂歌
涉江無可寄
幽恨竟如何

廣江驛餞筵留別

別筵欲盡秋
一醉海西樓
夜雨寒潮水
孤燈萬里舟
酒飛鸚鵡重
歌送鷓鴣
愁惆悵三年
客難期此處遊

桑落洲

九江寒露夕
微浪北風生
浦嶼漁人火
蒹葭鳬雁聲
蘋

雲晦廬岳微鼓辨湓城遠憶天邊弟那從此路行

杜門

且詠閒居賦飛翔去未能春風花嶼酒秋雨竹溪燈世
路變陵谷時情驗友朋達生書一卷名利付春冰

池州封員外郡齋雙鶴丹頂霜翎仙態浮曠罷
政之日因呈此章

瀟灑二白鶴對之高興清寒溪侶雲水朱閣伴琴笙顧
慕稻梁惠超遙江海情應携帝鄉去仙闕有飛鳴

九日陪崔大夫宴清河亭

玉體浮金菊，雲亭敞玳筵。
青山低畫浦，斜雁遠書天。
謝朓離都日，殷公出守年。
不知瑤水燕，誰和白雲篇。

桂州經佳人故居

種樹人何在，攀枝空歎嗟。
人無重見日，樹有每年花。
滿院雀聲暮，半庭春景斜。
東風不知恨，偏地落餘霞。

中秋廣江驛示韋益

莫惜三更坐，難消萬里情。
同看一片月，俱在廣州城。
淚

逐金波滿魂隨夜鶴驚
支頤鄉思斷無語到雞鳴

長沙開元寺音與故長林許侍御題松竹聯句
牆陰數行字懷舊慘傷情
薜荔侵年月莓苔壓姓名
逝川前後水浮世短長生
獨立秋風暮凝顰隔郢城

湖閣曉晴寄呈從翁

嶺日開寒霧湖光蕩霽華
風鳥搖徑柳水蝶戀幽花
蜀國地西極吳門天一涯
輕舟欄下去點點入湘霞

遊玉芝觀

尋仙向玉清獨倚雪初晴木落寒郊迴烟開疊嶂明片
雲盤鶴影孤磬雜松聲且共探玄理歸途月未生

經費冠卿舊隱

雲卧竟不起少微空隕光惟應孔北海為立鄭公鄉舊
館苔蘚合幽齋松菊荒空餘書帶草日日上階長

長沙春望寄岑陽故人

清明前後雨晴時極浦空蟬一望眉湖畔春山烟點點
雲中遠樹墨離離依依微水成聞聲鼓掩映沙村見酒旗

風暖草長愁自醉行吟無處寄相思

金塘路中

山連楚越復吳秦蓬梗何年是住身黃葉黃花古城路
秋風秋雨別家人冰霜遠度商顏凍桂玉愁居帝里貧
十口繫心拋不得每迴回首即長顰

湘陰江亭寄友人

湘岸初晴淑景遲風光正是客愁時幽花夜落騷人浦
芳草初生帝子祠往事隔年如過夢舊遊回首謾追思

烟波自此扁舟去小酌文園杳未期

哭郴州王使君

銀章朱紱照雲驄六換魚龍惠化崇
瑤樹忽傾滄海裏醉鄉翻在夜臺中
東山妓逐飛花散北海樽隨逝水空
曾是綺羅筵上客一來長慟向春風

九日巴丘楊公臺上宴集

淒淒霜日上高臺水國秋深客思哀
萬疊蒼山寒浪起一行斜字早鴻來
誰家搗練秋城暮何處題衣遠信回

江漢路長身不定菊花三笑旅萍開

寄張祐

越水吳山任興行五湖雲月挂高情不遊都邑稱平子
只向江東作步兵昔歲芳聲到童穉老來佳句偏公卿
如君文采波瀾地留比陰何沈范名

和吳中丞悼笙妓

麗質仙姿烟逐風鳳凰聲斷吹臺空多情草色怨還綠
無主杏花春自紅墮珥尚存芳樹下餘香漸減玉堂中

惟應去抱雲和管從此長歸阿姥宮

九子坡聞鷓鴣

落照蒼茫秋草明鷓鴣啼處遠人行正穿屈曲崎嶇路
更聽鉤輅格磔聲曾泊桂江深岝雨亦于梅嶺阻歸程
此時為爾腸千斷乞放今宵白髮生

長沙紫極宮雨夜愁生

獨坐高齋寒擁衾洞宮樓殿宵沈沈春燈合思靜相伴
夜雨滴愁更向深窮達未知他日事是非皆到此時心

羈棲摧剪平生志抱膝時為梁父吟

江樓閒望懷關中親故

搖落江天欲盡秋
遠鴻高送一行愁
音書寂絕秦雲外
身世蹉跎楚水頭
年貌暗隨黃葉去
詩情深付碧波流
風淒日冷江湖晚
駐目寒空獨倚樓

醉後贈馮姬

黃昏歌舞促瓊筵
銀燭臺西見小蓮
三寸橫波回慢水
一雙纖手語香絃
桂枝淺拂梁家黛
瓜字初分碧玉年

願托襄王雲雨夢陽臺今夜降神仙

秣陵懷古

野花黃葉舊吳宮六代豪華燭散風龍虎勢盤佳氣歇
鳳皇名在故臺空市朝遷變秋無綠墳塚高低落照紅
霸業鼎圖人去盡獨來惆悵水雲中

黃陵廟

小姑洲北浦雲邊二女容華自儼然野廟向江春寂寂
古碑無字草芊芊東風迎墓吹芳芷落月深山哭杜鵑

猶似含顰望
巡狩九疑如黛隔湘川

青鷗

獨立蒹葭雨
低飛浦溆風
須知毛色下
莫入鷺鷥叢

客愁

客愁看柳色
日日逐春深
浩蕩春風起
誰知歷亂心

古詞

一合相思淚
臨風灑素秋
碧波如會意
却與向西流

寄韋秀才

荆臺蘭渚客寥落共含情空館相思夜孤燈照雨聲

題竹

一頃含秋綠森風十萬竿氣吹朱夏轉聲掃碧霄寒

寄友

野水晴山雪後時獨行村落更相思無因一向溪頭醉
處處寒梅映酒旗

紫極宮齋後

紫府空歌碧落寒曉星寥亮月光殘一羣白鶴高飛上

誰有松風吹石壇

喜渾吉見訪

公子春山桂水香
遠衝飛雪過書堂
貧家冷落難消日
惟有松筠滿院涼

題王侍御宅

門向滄江碧岫開
地多鷗鷺少塵埃
綠陰十里灘聲急
閒自王家看竹來

送客

沅水羅文海燕回柳條牽恨到荆臺定知行路春愁裏
故逞城邊見落梅

黃陵廟

黃陵廟前莎草春黃陵女兒茜裊新輕舟短棹唱歌去
水遠山長愁殺人

北亭

小雨飛絲織晚空疎簾半捲野亭風荷花開盡秋光晚
零落殘紅綠沼中

秋登涪陽城

萬戶砧聲水國秋涼風吹起故鄉愁行人望遠偏傷思
白浪青楓滿北樓

南莊春晚

草暖沙長去望舟微茫烟浪向巴丘沅江寂寂春歸盡
水綠蘋香人自愁

蘇拯

寄遠

遊子雖惜別一去何時見飛鳥時戀巢萬里亦何遠妾
願化為霜日日下河梁若能侵鬢色先染薄情郎

衛鶴臺

築臺非為賢獨聚乘軒鶴六馬不能馭九臯欲何託一
旦敵兵來萬民同隕獲如何警露禽不似銜環雀微物
倘悞人衆類皆成惡至今臺基上飛鳥不至泊

馬嵬坡

一從殺貴妃春來花無意此地縱千年土香猶自異寵

既出常情辱豈同常理一等異于衆傾覆皆如此

漁人

垂竿朝與暮披蓑卧橫楫不問清平時自樂滄波業長
畏不得閒幾度避遊畋當晒釣臺上逃名名却傳

山中道者

筇杖六尺許坐石流泉所舉頭看古松似對仙鶴語是
時天氣清四迥無塵侶願我笑相迎一振丹砂羽

古塞

百戰已休兵塞雲愁未歇血染長城沙馬踏征人骨早
得用蛾眉免陷邊戍卒始知髦頭星不在彎弓沒

金谷園

積金累作山高與氷山似栽花比綠珠花落人亦墜徒
有敵國富不能買東市徒有絕世容不能樓上死令人
登高樓興歎在平地

思婦吟

秋風雁入歸邊信一何早攬衣出門望葉滿長安道一

從秉箕帚十載孤懷抱可堪日日醉蒲桃不說思君令人老

聞猿

秋風颯颯猿聲起客恨猿悲一相似祇向孤危傷客心何曾解入笙歌耳

儲嗣宗

南陂遠望

閒門橫古塘紅樹已驚霜獨立望秋草野人耕夕陽孤

烟起蝸舍飛鷺下漁梁惟有田家事依依似故鄉

宿玉蕭宮

塵飛不到空露濕紫微宮鶴影石橋月簫聲松殿風綠
毛辭世女白髮入壺翁借問燒丹處桃花幾徧紅

晚眺徐州延福寺

彩風振旅塵晚景藉芳茵片水明在野萬花深見人靜
依歸鶴思遠惜舊山春今日惜攜手寄懷吟白蘋

宿甘棠館

塵跡入門盡悄然江海心水聲巫峽遠山色洞庭深風
樹落寒子嵐烟凝夕陰前軒鶴歸處蘿月思沈沈

秋夜行船

扁舟時屬暝月上有餘輝海燕秋還去漁人夜不歸中
流何寂寂孤棹夜依依一點前村火誰家未掩扉

別至弘上人

最稱弘偃少早歲草茅居年老從僧律生知解佛書衲
衣求壞帛野飯拾春蔬章句無求斷詩中學有餘

送李端

故園衰草徧離別正堪悲
路出塞雲外人歸暮雪時
少孤為客早多難惜君遲
掩泣空相憶風塵何所期

孤雁

孤雁暮飛急蕭蕭天地秋
關河正黃葉消息斷青樓
湘渚烟波遠驪山風雨愁
此時萬里道魂夢遶滄洲

贈隱者

盡室居幽谷亂山為四隣
霧深知有術窗靜似無人
鶴

語松上月花明雲裏春生涯更何許尊酒與垂綸

早春懷薛公裕

幽獨自成愚柴門日漸蕪陸機初入洛孫楚正遊吳失意怨楊柳異鄉聞鷓鴣相思復相望春草滿南湖

送友人遊吳

吳山清楚吟草色異鄉心一酌水邊酒數聲花下琴登樓舊國遠探穴九疑深更想逢秋節那堪聞夜砧

經故人舊居

萬里訪遺塵鶯聲淚濕中古書無主散廢宅與山鄰宿
草風悲夜荒村月弔人淒涼問殘柳今日為誰春

吳宮

荒臺荆棘多忠諫沒如何細草迷宮巷閒花悞綺羅前
溪徒自綠子夜不聞歌惆悵清江暮悠悠東去波

聖女祠

石屏苔色涼流水遶祠堂巢鵲凝天漢潭花似鏡妝神
來雲雨合俗奠蕙蘭香不復聞雙佩山門空夕陽

送顧陶校書歸錢塘

清苦月偏知南歸瘦馬遲囊輕綠換酒髮白為吟詩水
色西陵渡松聲伍相祠聖朝思直諫不是挂冠時

登蕪城

昔人登此地丘隴已前悲今日又非昔春風能幾時

滄浪峽

滄浪臨古道道上石成塵自有滄浪峽誰為無事人

垓城

百戰未言非孤軍驚夜圍山河意氣盡淚濕美人衣

和茅山高拾遺憶山中雜題山泉一首

香味清機仙府回縈紆亂石便流杯春風莫汎桃花去
恐引漁人入洞來

胡山

犬入五雲音信絕鳳樓凝碧悄無聲焚香古洞步虛夜
露濕松花空月明

小樓

松杉風外亂山青
曲几焚香對石屏
空憶去年春雨後
燕泥時污太玄經

隨邊使過五原

偶逐星車犯敵塵
故鄉常恐到無因
五原西去陽關外
日沒平沙不見人

春懷寄秣陵知友

廬江城外柳堪攀
萬里行人尚未還
借問景陽臺下客
謝家誰更卧東山

宋州月夜感懷

雁池衰草露霑衣
河水東流萬事微
寂莫青陵臺上月
秋風滿樹鵲南飛



石倉歷代詩選卷九十八

欽定四庫全書

集部

石倉歷代詩選卷

九十九
一百

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣孫球

膳錄監生臣吳壽朋

欽定四庫全書

石倉歷代詩選卷九十九

明 曹學佺 編

晚唐二十六

劉得仁

夏夜會同人

沈沈清暑夕星斗儼虛空
岼嶺栖禽下烹茶玉漏中
形骸忘已久偃仰趣無窮
自汲泉來救微開密篠風

和厲玄侍御題戶部相公廬山草堂

白雲居創畢詔入鳳池年林長雙峰樹潭分並寺泉石
溪盤鶴外岳室閑猿前柱史題詩後松門更肅然

塞上行作

鄉井從離別窮邊觸目愁生人居外地塞雪下中秋雁
舉之衡翅河穿入塞流將軍心莫苦向此取封侯

宣義亭子

暮色遶高亭南山出竹青夜深斜舫月風定一池星島

嶼無人跡菰蒲有鶴翎此中足吟眺何用泛滄溟

冬日落駱家亭子

亭臺臘月時松竹見貞姿林積烟藏日風吹水合池恨
無人此住惟有鶴相窺是景吟詩偏真于野客宜

遊崔監承城南別業

門與青山近青山復幾重雪融皇子岍春浥翠微峰地
有經冬草林無未老松竹寒溪隔寺晴日直聞鐘

寄姚諫議

鳴鞭靜路塵籍籍諫垣臣
函疏封還密爐香侍立親
簾多臨水作窗宿卧雲人
危坐開寒紙燈前起草頻

上張水部

出入門閭久兒童亦有情
不須將姓字長說向公卿
每許連牀坐時容並馬行
恩深轉無語懷抱自分明

贈江夏盧使君

詩人中最屈無與使君儔
白髮雖求退明時合見收
登山猶自健縱酒可多愁
好是能騎馬相逢見鄂州

夏日通濟里居酬諸先輩見訪

君子遠相尋，聯鑣到散林。
有詩難索和，無酒可賒斟。
門列晴峰色，堂開古木陰。
何因駐清聽，惟恐日西沉。

答韋先輩春雨後見寄

風散五更雨，鳥啼三月春。
軒窗透初日，硯席絕纖塵。
帝里峰頭出，隣家樹色新。
憐君高且靜，有句寄閒人。

夏日即事

到曉改詩句，四隣嫌苦吟。
中宵橫北斗，夏木隱栖禽。
天

地先秋肅軒窗映月深
幽庭多此景惟恐曙光侵

晚夏

日夕是西風流光半已空
山光漸凝碧樹葉即翻紅
學淺慚多士秋成羨老農
誰憐信公道不泣路岐中

秋夕即事

永夕坐暝久蕭蕭猿犬啼
漏微砧韻隔月落斗杓低
危葉無風墜幽禽銜樹栖
自憐在岐路不醉亦沈迷

聽夜泉

靜裏層層石潺湲到鶴林流環出幾洞源遠歷千岑寒
助空山月清兼此夜心幽人聽達曙相和蘚牀吟

池上宿

事事不求奢長吟省歎嗟無才甘世棄有句向誰誇老
樹呈秋色空池浸月華涼風白露夕此境屬詩家

宣義池上

修篁夾綠池幽絮此中飛何必青山遠仍將白髮歸鳥
啼亦有恨鷗習總無機樹起秋風息西林磬入微

中秋夜

塵裏兼塵外咸期此夕明一年惟一度長恐有雲生露
洗微埃盡光濡是物清朗吟看正好惆悵又西傾

送蔡京東歸迎侍

高堂惟兩別此別是榮歸薄俸迎親遠平時知己稀
鄆郊秋木見魯寺夜鐘微近臘西來日多逢霰雪飛

夜携酒訪崔正字

只應芸閣吏知我僻兼愚吟興忘飢凍生涯任有無
慘

雲埋遠岫陰吹吼寒株忽起圍爐思招携酒滿壺

夏夜會同人

沈沈清暑夕星斗儼虛空岼嶂栖禽下烹茶玉漏中形骸忘已久偃仰趣無窮自汲泉來漱微開密篠風

秋日同僧宿西池

茁茁遍秋水隔林香似焚僧同池上宿霞向月邊分渚鳥栖蒲立城砧接曙聞來宵莫他約重此話孤雲

宿韋津山居

永夕見招宿詩書盈草堂靜吟傾美酒高論出名場窗
颯松篁韻庭兼雪月光心期身未老一去泛瀟湘

秋夜喜友人宿

莫話春闈事清宵且共吟頻年遺我輩何日遇知音
暝天傾斗將寒葉墜林無將簪紱意祇損壯夫心

回中夜訪獨孤從事

滿庭霜月魄風靜絕纖聞邊境時無事州城夜訪君擁
裘聽塞角酌醴話湘雲贊佐元戎美恩齊十萬君

哭翰林丁侍郎

相知出肺腑非舊亦非親每見雲霄侶多揚鄙拙身即
期扶泰運豈料哭賢人應是隨先帝依前作近臣

哭鮑溶有感

寥落故人宅今來身已亡古苔封墨沼深竹映書堂秋
色池館靜雨聲雲水涼無因展交道日暮剖心腸

題山中故靜禪師

寂滅身何在門人隔此生影懸塵已厚塔種柏初成溪

院秋先雪山堂古有精當時挂錫劒樹老幾枝傾

弔草堂禪師

杖履疑師在房關四壁蛩貯瓶經臘水響塔隔山鐘乳
鷓沿苔井齋猿散雪峰如何不見性倚徧寺前松

題終南麻先生寂禪師石室

同居石室貧五十二迴春擁褐冥心客窮經暮齒人翠
沈空水定雨絕片雲新危細秋峰徑相隨到頂頻

題吳先生山居

先生此幽隱便可謝人羣
潭底見秋石樹間飛霽雲
山居心已慣俗事耳憎聞
念我要多疾開爐藥許分

送姚處士歸亳州

白髮麻衣破還譙別弟迴首垂聽樂
淚花落待歌杯石路尋芝熟柴門有鹿來
明王下徵詔應就碧峰開

題王處士山居

茅堂入谷遠林暗絕其隣終日有遊水
經年無到人溪雲常欲雨山洞別開春
自得仙家術栽松獨養真

曉別呂山人

疎鐘兼漏盡曙色照青氛
栖鶴出高樹山人歸白雲
月盈期重宿丹熟約相分
羨入秋風洞幽泉子細聞

宿僧院

禪地無塵夜焚香話所歸
樹搖幽鳥夢螢入定僧衣
破月斜天半高河下露微
翻令嫌白日動即與心違

青龍寺僧院

常多簪組客非獨看高松
此地堪終日開門見數峰
苔

新禽跡少泉冷樹陰重師意如山裏空房晚暮鐘

冬日題邵公院

無事關多掩陰階竹拂苔勁風吹雪聚渴鳥啄冰開樹
向寒山得人從瀑布來終期天目老擎錫逐雲迴

夏日遊慈恩寺

何處消長日慈恩精舍頻僧高容野客樹密絕囂塵閒
上凌虛塔相逢避暑人却愁歸去路馬迹並車輪

晚遊慈恩寺

寺去幽居近每來因採薇伴僧行不困臨水語忘歸磬
動青林晚人驚白鷺飛堪嗟浮俗事皆與道相違

送知全禪師南遊

師譽振京城談空萬乘聽北行山已雪南去木猶青夜
嶽禪銷月秋潭汲動星迴期不可定孤鶴在高冥

送智玄首座歸蜀中舊山

像教得重興因師說大乘從來悟明主今去證高僧蜀
國烟霞異靈山水月澄鄉閭諸善友似喜見南能

送僧歸玉泉寺

玉泉歸故剎便老是心期
亂木孤禪後寒山絕鳥時
若尋流水去轉出白雲遲
見說千峰路溪深頂復危

寄樓子山雲棲上人

一室鑿崔嵬危梯疊蘚苔
永無塵事到時有至人來
澗谷冬深靜烟嵐日午開
修身知得地京寺未言迴

冬夜寄白閣僧

營營不自息睽澗數年情
林下期難逐人間事旋生鳥

棲寒木迥月映積冰清石室焚香坐懸知不為名

晚步曲江因謁慈恩寺恭上人

豈曰趨名者年年待命通坐令青嶂上興起白雲中
岍浸如天水林舍似雨風南宗猶有碍西寺問恭公

憶鶴

自爾歸仙後經秋又過春白雲尋不見紫府去無因
此地空明月何山伴羽人將期華表上重見令威身

吳天觀新栽竹

清風枝葉上山鳥已栖來根別古溝岬影生秋觀苔偏
思諸草木惟此出塵埃恨為移君晚空庭更擬栽

初夏題段郎中修竹里南園

高人遊息處與此曲池連密樹繞春後深山在目前遠
峰初絕雨片石欲生烟數有僧來宿應緣靜好禪

西園

夏圃秋涼入樹低逢幘歌水聲翻敗堰山翠濕疎籬綠
滑莎藏徑紅連果壓枝幽人更何事旦夕與僧期

送姚合郎中任杭州

水陸中分程看花一月行
會稽山隔浪天竺樹連城
候吏齋魚印迎船載旆旌
渡江春始半列嶼草初生

送周鉞往江夏

東西南北郡自說徧曾遊
人世終多故皇都不少留
郢城帆過夜漢水月方秋
此謁親知去聞猿豈解愁

送靈武朱書記

靈師與誰善得君
密幕中從容應盡禮
贊畫致元功連

塞雲長慘纔秋樹半空相如偏自慙掌記復乘驄

早春送湘潭李少府之任

柳新春水湄春岼草離離祖席觴云盡離人淚各垂葉
文傳不朽作尉豈多時公退琴堂上風吹班竹枝

送越客歸

霜薄東南地江楓落未齊衆山離楚上孤棹宿吳西渚
客留僧語籠猿失子啼到家冬即是荷盡若耶溪

送河池李明府之任

河池安所理種柳與彈琴自合清時化仍資白首吟程
餘行片月公退入遙林想得詢民瘼方稱單父心

送蔡京侍御赴大梁幕

同城各多故會面亦稀疏及道須相別臨岐恨有餘梁
園飛楚鳥汴水走淮魚衆說裁軍檄陳琳遠不如

監試蓮花峰

太華萬餘重宕菟只此峰當秋倚寥法入望似芙蓉翠
拔千尋直青危一朶穠氣分毛女秀靈有羽人縱倒影

侵官路流香激廟松塵埃終不及車馬自憧憧

京兆府試目極千里

獻賦多年客低眉恨且千此心常鬱矣縱目忽超然送
驥登長路看鴻入遠天古墟烟幕幕窮野草綿綿樹與
金城接山疑挂水連何當開霽日無物翳平川

上姚諫議

高文興盛德皆謂古無倫聖代生才子明庭有諫臣已
瞻龍苑近漸向鳳池新却憶波濤郡來時島嶼春名因

詩句大家似布衣貧曾暗投新軸頻聞獎滯身照吟清
夕月送藥紫霞人終計依門館何疑不化鱗

書事寄萬年厲員外

帝城皆劇縣令尹美居東遂拜趙張下斲離星象中擁
歸從北關送上動南宮紫禁黃山遠滄溟素滙通封疆
新日月邑里出王公賦稅充天府歌謠入聖聰土膏寒
麥覆人海畫塵蒙廨宇松連翠朝街火散紅文場新桂
茂粉署舊蘭崇留客揮盈爵抽毫詠早鴻前駟潘岳貴

故里邵平窮勸隱蓮峰久期耕樹谷同鳬飛將去葉劒氣
尚埋豐何必華陰上方垂拂拭功

和段校書冬夕寄題廬山

嘗聞廬嶽頂半入楚江湄幾處懸崖上千尋瀑布垂爐
峰松浙瀝湓浦柳參差日色連湖白鐘聲拂浪遲烟梯
緣薜荔岳寺步步歌危地本饒靈草林曾出祖師石樓霞
耀壁猿樹鶴分枝細徑縈巖末高窗見海涯嵌空寒更
極寂寞夜尤思陰谷冰埋木仙田雪覆芝亂泉禪客瀨

異迹逸人知
蘚室新開竈
樅潭未了棊
如何遂閒放
長得任希夷

和鄭校書夏日遊鄭泉

太虛懸畏景
古木蔽清陰
爰有泉堪挹
閒思日可尋
來聞鳴滴滴
照竦碧沈沈
幾脉成溪壑
何人測淺深
澄時無一物
分處歷千林
淨溉靈根藥
涼浮玉翅禽
飲疑蠲宿疾
見自失煩襟
僧共雲前瀨
龍和月下吟
疊光輕吹動
澈底曉霞侵
不用頻遊去
令君少進心

宿普濟寺

京寺數何窮清幽此不同曲江臨閣北御苑自牆東廣
陌車音急危樓夕景通亂峰沈暝野毒暑過秋空幡飈
虛無裏星生杳靄中月光籠月殿蓮氣入蓮宮綴草涼
天露吹人古木風飲茶除假寐聞磬釋塵蒙童子眠苔
淨高僧話漏終待鳴曉鐘後萬井復腫朧

賦得聽松聲

庭際微風動高松韻自生聽時無物亂盡日覺神清強

與幽泉並翻嫌細雨并拂空增鶴唳過牖合琴聲況復
當秋暮偏宜在月明不知深澗底蕭瑟有誰驚

題從伯舍人道正里南園

帝里餘新第朱門面碧岑曙堂增典氣喬木動清陰直
去親瑤陛朝迴在竹林風流才子調好尚古人心薜荔
遮窗暗莓苔近井深禮無青草隔詩有白衣吟軒靜留
孤鶴庭虛到遠砧掩關裁鳳詔開鏡理瓊簪種植今如
此塵埃永不侵雲奔投刺者日日待為霖

尋陳處士山堂

步溪凡幾轉始得見幽縱路隱千根樹門開萬仞峰片
雲生石竇淺水卧枯松窮谷風光冷深山翠碧濃鶴看
空裏過仙向坐中逢底露秋潭水聲微暮觀鐘他年來
此定異日願相容且喜今歸去人間事更慵

春和吳翰林丁侍郎禁署早春情望

御林聞有早鶯聲玉檻春香九陌晴寒著霽雲歸紫閣
暖浮佳氣動芳城宮池日到冰初解輦路風吹草欲生

駕侶此時皆賦詠
高山雪在思偏清

山中尋道人不過

年過弱冠風塵裏
常擬隨師學鍊形
石路特來尋道者
雲房空見有仙經
慕于松底留殘局
鶴向潭邊退數翎
便欲此居閒到老
先生何日下青冥

憶鶴

白絲翎羽丹砂頂
曉度秋烟出翠微
來向孤松枝上立
見人吟苦却高飛

老宮人

白髮宮娃不解悲，滿頭猶自插花枝。
曾緣玉貌君王寵，準擬人看似舊時。

村中閒步

閒共野人臨野水，新秋高樹挂清暉。
不知塵裏無窮事，白鳥雙飛入翠微。

別山居

萬壑千巖景象開，登臨未足又須回。
憑師莫斷松間路，

秋月圓時弟子來

贈道人

長在城中無定業
賣丹磨鏡兩途貧
三山來往尋常事
不省曾驚市井人

石倉歷代詩選卷九十九

欽定四庫全書

石倉歷代詩選卷一百

明 曹學佺 編

晚唐二十七

趙嘏

字承祐
山陽人

書齋雪後

擁褐坐茅簷春晴喜初日微風入桃徑爽氣歸縹帙頻
時苦風雪就景理巾櫛樹暖高鳥來窗閒曙雲出鄉遙

路難越道蹇時易失欲靜又不能東山負芝朮

經無錫縣醉後吟

客過無名姓扁舟繫柳陰窮秋南國淚殘日故鄉心京
洛衣塵在江湖酒病深何須覓陶令乘醉自橫琴

東歸道中二首

平生事行役今日始知非歲月老將至江湖春未歸傳
家有書籍主祭用儒衣何必勞知己無名亦息機

其二

未明喚僮僕江上憶殘春風雨落花夜山川驅馬入星
星一鏡髮草草百年身此日念前事滄洲情更親

旅次商山

役役依山水何曾似問津斷崖如避馬芳樹欲留人日
夕猿鳥伴古今京洛塵一枝甘已失惆悵故園春

贈越客

故國波濤隔明時心久留獻書雙闕晚看月五陵秋南
棹何當返西江憶共遊定知釣魚伴相望在汀洲

送友人鄭州歸覲

為有趨庭戀應忘
道路賒風消榮澤
凍雨靜圃田沙古
陌人來遠遙天
雁勢斜園林新到
日春酒酌梨花

送權先輩歸覲信安

衣綵獨歸去一枝
閒更香馬嘶芳草
渡門掩百花塘野
色亭臺曉灘聲枕
簟涼小齋松島上
重拂讀書牀

洛中逢盧郢石歸覲

不堪俱失意相送
出東周緣切倚門
戀倍添為客愁春

山和雪靜寒水帶水流別後期君處靈原紫閣秋

宿靈巖寺

明月溪頭寺蟲聲滿橘洲倚欄香逕晚移石太湖秋樹
老雲歸盡臺荒水更流無人見惆悵獨上最高樓

越中寺居

遲客疎林下斜溪小艇通野橋連寺月高竹半樓風水
靜魚吹浪花枝閒鳥下空數峰相向綠日夕郡城東

長洲

扁舟殊不繫浩蕩路纔分范蠡湖中樹吳王苑外雲悲
心人望月獨夜雁離羣明發還驅馬關中見日曛

題昭應王明府溪亭

靖節何須彭澤逢菊洲松島水悠溶行人自折門前柳
高鳥不離溪畔峰曉渭度簷帆的的晚原含雨樹重重
軒車過盡無公事枕上一聲長樂鐘

題杜侍御別業

紫陌烟多不可尋南溪酒熟一披襟山當畫枕石常穩

泉落夜窗秋樹深
白首逢人羞問計
青雲何路覓知音
惟君懷抱閒如水
終日門牆許醉吟

泊鳬磯江館

風雪晴來歲欲除
孤舟晚下意何如
月當軒色湖平後
雁斷雲聲夜起初
傍晚管絃何處靜
犯寒楊柳遶津疎
三間茅屋東溪上
歸去生涯竹與書

發剡中

正懷何謝俯長流
更覽餘封識嶧州
樹色老依官舍晚

金匱山房集卷一百一
溪聲涼傍客衣秋南樓氣爽橫郭郭天姥雲晴拂寺樓
日暮不堪還上馬蓼花風起路悠悠

西峰卽事獻沈大夫

松竹閒遊道路身衣襟落盡往來塵山連謝宅餘霞在
水映琴溪舊浪春拂榻從容今有地酬恩寂寞久無人
安知不及屠沽者曾對青萍淚滿巾

寄淮南幕中劉員外

郎官何遜最風流愛月憐山不下樓三佐戎旃換朱紱

一辭蘭省見清秋。桂生巖石元瀟灑。鶴到烟空更自由。
休向西齋久閒卧。滿朝傾蓋是依劉。

淮信賀滕邁台州

凋瘵民思太古風。上賢綏緝副宸衷。舟移清鏡禹祠北。
路轉翠屏天姥東。旌旆影前橫竹馬。詠歌聲裏樂樵童。
遙知到郡滄波晏。三島離離一望中。

寄潯陽趙校書

簾下秋江夜影空。倚樓人在月明中。不將行止問朝列。

惟脫衣裳與釣翁幾處別巢悲去燕十年回首送歸鴻
那應更結廬山社見說心閒勝遠公

贈李從貴

白馬嘶風何處還鞭稍拂地看南山珠簾捲盡不回首
春色欲闌休閉關花外鳥歸殘雨暮竹邊人語夕陽閒
知君舊隱嵩雲下巖桂從今幾更攀

下第寄宣城幕中諸公

過眼寧愁五色迷暫陪歡笑醉如泥黃花李白墓前草

碧浪桓彝宅後溪九月霜中隨計吏十年江上灌春畦
莫言春盡不惆悵自在閒眠到日西

洞庭寄所思

月斷蘭臺空望歸錦衾香冷夢來稀書中空有刀頭約
天上頻看破鏡飛孤浪漫疑施粉黛輕雲忽似舞羅衣
遙知不語坐相憶寂寞洞房寒燭微

代人贈杜牧侍御

郎作東臺御史時妾長西望斂雙眉一從詔下人皆羨

豈料恩衰不自知，高闕如天紫曉夢華筵似水隔秋期。
坐來情態猶無限，更向樓前舞柘枝。

山陽卽席獻裴中丞

早年天上見清塵，今日樓中醉一春。
暫肯剖符臨水石，幾曾焚筆動星辰。
瓊臺雪映迢迢鶴，蓬島波橫浩浩津。
好是仙家羽衣使，欲教垂涕問何人。

寄歸

三年踏盡化衣塵，只在長安不見春。
馬過雪街天未曙。

鄉迷關路淚空頻
桃花塢接啼猿樹
野竹庭通畫鷁津
早晚相酬身事了
水邊歸去一閒人

和令狐補闕春日獨遊西街

左掖初辭近侍班
馬嘶尋得過街閒
映鞭柳色微遮水
迎步花枝欲礙山
暖泛鳥聲來席上
醉從詩句落人間
此時失意哀吟客
更覺風流不可攀

答友人

詩家才子酒家仙
遊宦曾依積水邊
窗戶動搖三島樹

琴樽安穩五湖船
羅浮道士分瓊液
錦席佳人艷楚蓮
今日相逢朗吟罷
滿城砧杵一燈前

九日陪越州元相宴龜山寺

佳晨何處泛花遊
丞相筵開水上頭
雙影旆搖山雨霽
一聲歌動寺雲秋
林花靜帶高城晚
湖色寒分半檻流
共賀萬家逢此節
可憐風物似荊州

李侍御歸山同宿華嚴寺

家有青山近玉京
風流柱史早知名
園林手植自含綠

霄漢眼看當去程處處白雲迷駐馬家家紅樹近流鶯
相逢一宿最高寺夜夜翠微泉落聲

旅館聞雁別友人

路遠秋塘首獨搔背羣燕雁正呼號故關何處重相失
碧落有雲終自高旅宿去緘他日恨單飛誰見此生勞
行衣濕盡千山雪腸斷金籠好羽毛

寒食新豐別友人

一百五日家未歸新豐雞犬獨依依滿樓春色傍人醉

夜半雨聲前計非繚繞溝塍含綠晚荒涼樹石向川微東
風吹淚對花落憔悴故交相見稀

送令狐郎中赴郢州

左幕才多始拜侯一門清賞動神州霜蹄曉駐秦雲斷
野旆情翻郢樹秋幾處塵生隨候騎半江帆盡見分流
大馮罷相吟詩地莫惜頻登白雪樓

送張又新除溫州

東晉江山稱永嘉莫辭紅旆向天涯凝絃夜醉松亭月

歇馬曉尋溪寺花地與剡川分水石鏡將蓬島共烟霞
却愁明詔徵非晚不得秋來見海槎

送剡客

兩重江外片帆斜數里林塘遠一家門掩右軍餘水石
路橫諸謝舊烟霞扁舟幾處逢溪雪長笛何人思柳花
若到天台洞陽觀葛洪丹井在雲涯

送盧緘歸揚州

曾向雲塘寄掩扉荀家燈火有餘輝關河日暮望空極

楊柳渡頭人獨歸
隋苑荒臺風裊裊
灞陵殘雨夢依依
今年春色還相悞
為我江邊謝釣磯

送李蘊赴鄭州因獻盧郎中

僕射陂西想到時
滿川晴色見旌旗
馬融閒卧笛聲遠
王粲醉吟樓影移
幾日賦詩秋水寺
經年草詔白雲司
惟君此去人多羨
却是恩深自不知

送韓絳歸淮南寄韓綽先輩

島上花枝繫釣船
隋家宮畔水連天
江帆自落鳥飛外

月觀靜依春色邊
門巷草生車轍在
朝廷恩及雁行聯
相逢且問揚州事
曾鼓莊盆對逝川

重遊楚國寺

往事飄然竟不同
空餘山色在樓臺
池塘風暖雁羣去
松檜樹高人獨來
莊叟著書直達者
賈生揮涕信悠哉
老僧心地閒于水
猶被流年白髮催

早發剡中法堂寺

暫息勞生一夕間
平明世事又相關
吟辭宿處烟霞古

身負秋來水石閒
竹戶半開鐘未絕
松枝微霽鶴初還
明朝一倍堪惆悵
回首塵中見此山

三像寺酬元秘書

官總芸香閣
署崇可憐詩句落
春風偶然侍坐水聲裏
還許醉吟松影中
車馬照來紅樹合
烟霞詠盡翠微空
不因高寺閒回首
誰識飄零一塞翁

贈天卿寺神亮上人

幾看春盡此江濱
花自飄零日自曛
空有慈悲隨物念

已無蹤跡在人羣
迎秋日色簷前見
入夜鐘聲竹外聞
笑指白蓮心自得
世間煩惱是浮雲

題崇聖寺簡雲端僧錄

暮雲飄盡客愁長
來扣禪關月滿廊
宋玉逢秋空雪涕
淨名無地可容牀
高雲覆檻千巖樹
疎磬含風一夜霜
迴首故園紅葉外
只將多病告醫王

越中寺居寄上主人

野寺初容訪靜來
晚晴江上見樓臺
中林有路到花盡

一日無人看竹迴自曬詩書經雨後別留門戶為僧開
苦心若是酬恩事不敢吟春憶酒盃

送僧歸廬山

禪棲忽憶五峰遊去著方袍謝列侯花啓樓臺千葉曙
錫含風雨一枝秋題詩石峻侵雲在洗鉢泉香覆菊流
却憶前年別師處馬嘶殘月虎溪頭

降卒

廣武溪頭降卒稀一聲寒角怨金微河湟不在春風地

歌舞空裁雪夜衣
鐵馬半嘶邊草去
狼烟高映塞鴻飛
揚雄尚白相如吃
今日何人從獵歸

長安晚秋

雲物淒涼拂曙流
漢家宮闕動高秋
殘星幾點雁橫塞
長笛一聲人倚樓
紫艷半開籬菊靜
紅衣落盡渚蓮愁
鱸魚正美不歸去
空戴南冠學楚囚

齊安早秋

流年堪惜又堪驚
砧杵風來滿郡城
高鳥過時秋色動

征帆落處暮雲平
思家正羨江南景
聽角仍含塞北情
此日沾襟念岐路
不知何處是前程

東望

楚江橫在草堂前
楊柳洲邊載酒船
兩見梨花歸不得
每逢寒食一潸然
斜陽映閣山當寺
微綠含風樹滿天
同郡故人攀桂盡
把詩吟向汶寥天

長安月夜與友人話故山

宅邊秋水浸苔磯
日日持竿去不歸
楊柳風多潮未落

蒹葭霜在雁初飛
重嘶足馬吟紅葉
却聽疎鐘憶翠微
今夜秦城滿樓月
故人相見一沾衣

題橫水驛雙峰縣松

故園溪上雪中別
野館門前雲外逢
白髮漸多何事苦
清陰長在好相容
迎風幾拂朝天騎
帶月猶含度嶺鐘
更憶葛洪丹井畔
數株臨水欲成龍

登安陸西樓

樓上華筵日月開
眼前人事祗堪哀
征車自入紅塵去

遠水長穿綠樹來
雲雨暗更歌舞伴
山川不盡別離杯
無由併寫春風恨
欲下鄖城首重回

經漢武泉

芙蓉苑裏起清秋
漢武泉聲落御溝
他日江山映蓬鬢
二年楊柳別漁舟
竹間駐馬題詩去
物外何人識醉遊
盡把歸心付紅葉
晚來隨水向東流

歲暮江軒寄盧端公

積水生高浪
長風自北時
萬艘俱擁棹
上客獨吟詩
路

以重湖阻心將小謝期渚雲愁正斷江雁重驚悲笑憶
遊星子歌尋寵貴池夢來孤島在醉醒百憂隨戍迥烟
生晚江寒鳥過遲問山樵者對經雨釣船移敢歎今留
滯猶勝曩別離醉從陶令得善必大人知道蹇才何取
恩深劍不疑此身同岼柳只待變寒枝

經郭汾陽宅

門前不改舊山河破敵曾經馬伏波今日獨經歌舞地
古槐疎影夕陽多

發青山館

鳬鷺聲煖野塘春
鞍馬風高驛路塵
一宿青山又須去
古來難得是閒人

山城驛

谿上郵亭氣早秋
樹邊溪色遶牀流
行人亦美郵亭吏
生向此中今白頭

江上晚泊

茫茫靄靄失西東
柳浦桑村處處同
戍鼓一聲帆影盡

水禽飛起夕陽中

度商山晚靜

和如春暖靜如秋
五月商山是勝遊
當晝火雲生不得
一溪分作萬重流

南亭

孤亭影出亂花中
悵望無人此醉同
聽盡暮鐘猶獨坐
水邊襟袖起春風

南園

雨過郊原綠尚微
落花惆悵滿塵衣
芳樽有酒無人共
日暮看山還獨歸

寄遠

禁鐘聲盡見棲禽
關塞迢迢故國心
無限春愁莫相問
落花流水洞房深

尋僧

溪戶無人百鳥飛
石橋橫木挂禪衣
看雲日暮倚松立
野水亂鳴僧未歸

宮烏栖

宮烏栖處玉樓深
微月生簷夜夜心
香輦不回花自落
春來空佩辟寒金

長信宮

君恩已盡欲何歸
猶有殘香在舞衣
自恨身輕不如燕
春來長繞御簾飛

廣陵城

紅映高臺綠繞城
城邊春草傍牆生
隋家不向此中盡

汴水應無東去聲

冷日過驪山

冷日微烟渭水愁
翠華宮樹不勝秋
霓裳一曲千門鎖
白盡梨園弟子頭

下第後歸永樂里自題二首

無地無媒只一身
歸來空拂滿牀塵
尊前盡日誰相對
惟有南山侶故人

玄髮侵愁似翁暝
塵寒袖共東風公
卿門戶不知處

立馬九衢春影中

出試日獨遊曲江

江莎漸映花邊綠樓日自開池上春雙鶴繞空來又去
不知臨水有愁人

題曹娥廟

青娥埋沒此江濱江樹颼颼慘暮雲文字在碑碑已墮
波濤辜負色絲文

題段氏中臺

看山臺下水無塵碧篠前頭曲水春獨對一樽風雨夜
不知家有早朝人

華州座中獻盧給事

送迎皆到三峰下滿面烟霜滿馬塵自是追攀認知己
青雲不假送迎人

贈歙州妓

濫濫橫波思有餘庾樓明月墮雲初揚州寒食春風寺
看徧花枝盡不如

贈王明府

五柳逢秋影漸微
陶潛戀酒不知歸
但存物外醉鄉在
誰向人間問是非

呂校書雨中見訪

竹閣斜谿小檻明
惟君來賞見山情
馬嘶風雨又歸去
獨聽子規千萬聲

千秋嶺下

知有巖前萬樹桃
未逢搖落思空勞
年年盛發無人見

三十六谿春水高

重陽日寄韋舍人


節過重陽菊委塵江邊病起杖扶身不知此日龍山會
誰是風流落帽人

發新安後途中寄盧中丞

晚樹蕭蕭促織愁風簾似水滿牀秋千山不礙笙歌月
誰伴羊公上夜樓

贈五老韓尊師

有客齋心事玉晨對山鬚髮綠無塵住山道士季如鶴
應識當時五老人



石倉歷代詩選卷一百